

Vrbs ad Bætım Situ amœnissimo excellens, Ambitu magna, Forma fere rotunda, Visu pulcra, Templis celebris, ædium pulcherrimarum frequentia exculta. Tam multa de hac Vrbe præclara commemorari possent, ut natum sit inde & tritum vetustate proverbium, *Quino ha visto Sevilla, no ha visto Maravilla.* Cum aliis felici ingenii alumniis gaudet, tum Benedicto Aria Montano, nobilissimo & summo Theologo, plurimarum Linguarum cognitione stupendo. Testantur id Opera ab ipso edita, quæ summam ejus admirationem apud omnes excitant. Metropoli visa, reliquarum Urbium nonnullas indicabo, Ordinis incuriosior; sit tamen, ut quasque Metropoli suæ proximas primo loco. Offert se quinta ab Hispali leuca *Palatium* vel *Palantia*, quod vulgo *Palacios*, sic dictum ab Arce perantiqua, quam lateri habet adhærentem. Via situm, quæ ad S. Lucæ Fanum Fretumque Gaditanum ducit. Huic succedunt *Cabeca*, opidulum in Montium, qui in Meridiem Malagam versus se extendunt aditu situm: & Cabecis versus Libonotum ad tertiam leucam Opidum, quod vulgo *Lebrixa*, *Nebriſſa* Ptol. Plinius *Veneriam* cognominat. Situm fuit olim inter Bætis æstuarium, hodie octo pass. M. ab flumine, oblimato sinisterrimo Alveo. Conditor perhibetur Liber Pater. Opidulum est peramœnum & pulcrum cum Arce perveteri, Agro undique beatissimo cinctum. Cive nobilitatum est Elío Antonio Hispaniæ totius Ornamento. Quæ *Carmona* vulgo, *Carmon* Straboni est, *Carmon* Antonino, *Charmonia* Ptol. *Marchena* hodie, *Colonia* quondam, inquit Onuphrius ex antiqua basi, *Martia*. Situm est hoc Opidum in Colliculo quodam, ubique planities spectante. Sunt & Andalusie Opida *Lora* ad dexteram Bætis ripam: *Axalita* vetustis Lapidibus, teste Clu. *Flavium Axalitanum* Amb. Mor. ex antiqua item Inscriptione, inter Hispalim est & Cordubam. *Moren*, olim Clusio *Arucci*, notantibus Plinio, Antonino & prisco Lapide. *Ossuna*, *Orsona* Appiano, *Orson* Strab. *Urs* Plin. cui & *Genua* (forte *Gemina*) *Urbanorum*, *Ursaon* in antiquis hujus loci Inscriptionibus: *Ursao* Hirtio. *Egeia* ad Singulim fluvium hodie *Xenil* vel *Chenil*, Ptolemeo cluit *Astygis*, *Augusta Firma* cognominatur a Plinio: quod Opidum non adeo magnum hodie tredecim ab Hispali leucis visitur. Inter eandem Hispalim & Cordubam medio fere itinere, ad dexteram Bætis oram *Pena flor*, Ptol. putatur *Illipula magna*, in mediterraneis Turdulorum, *Ilipa* cognomine *Itahca* Plin. qui Hispalensi Conventui attribuit. Decimo hinc milliari ad ejusdem Fluvii ripam est *Corduba* Ptol. *Cordoua* vulgo: Plinius *Coloniā Patritiam* tradit cognominatam, quod etiam ex antiquis Marmoribus probat Moralis. *Corduba* tanquam *Cor Bætis* dicitur Ioanni Gerundenſi. Alumnos habuit rei militaris gloria doctrinæque studiis præcellentes. Beata hodie est *Corduba*, præter alia multa bona, fertilissimis Agris, Hortis amœnissimis, Aquis etiam saluberrimis. Solum Cordubæ vocat aureum Silius Italicus lib. 111

*Nec decus aurifera cessavit Corduba terra*

Quinque leucis ab Corduba versus Meridiem *Mons* est *Major*, vulgo *Monte Major*, *Ulia* existimatur Pto. Turdulorum in Hispania Bætica Vrbs: *Ulia Antonini*. Decem ab Corduba milliariis *Mons Aureus* est, *Montero* vocatur vulgo: *Epora* creditur Antonini. Male apud Ptolomæum, *Ebura* pro *Epora*, quum illa sit non Bætica, sed Lusitania: pejus autem *Ripepora* in vulgatis Plinii codicibus, ubi *Federatorum* cognominatur.